



Broj:02-04-1093/22

Datum, 31.10.2022.godine

ZAPISNIK
sa 20. redovne sjednice 7. saziva
Općinskog vijeća Doboj Istok

Dvadeseta redovna sjednica 7. saziva Općinskog vijeća održana je dana 27.10.2022. godine u zgradi općine Doboj Istok u Klokočnici sa početkom u 10,00 sati.

PRISUTNI: 15 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Dženad Mujkić, direktor JU OŠ „Klokočnica“, Edin Mrkanović, direktor JU OŠ „Brijesnica“, Jasmina Škrebo, direktorica JU „Dječija radost“ Doboj Istok, te predstavnik Televizije Tuzlanskog kantona.

ODSUTNI: Senada Džanić, predsjednica kluba vijećnika SBB – BPS i Refik Šuvalić, vijećnik SDA.

Sjednicu je otvorio predsjedavajući Općinskog vijeća, Nusret Dautović.

Nusret Dautović, predsjedavajući Općinskog vijeća: „Poštovani vijećnici, uvaženi načelnice, izvjestioci i pomoćnici načelnika sve vas srdačno selamim i pozdravljam. Otvaram 20. redovnu sjednicu 7. saziva Općinskog vijeća Doboj Istok i prije nego što krenemo zamolio bih tehničkog sekretara da utvrdi broj prisutnih na današnjoj sjednici. Znači, trenutno je prisutno 13 vijećnika, Senada Džanić i Refik Šuvalić su najavili odsustvo, a Adis Halilović je najavio da će zakasniti, dok se Omer Konjić nije javio, znači da imamo kvorum da nastavimo sa radom.“

USVAJANJE ZAPISNIKA SA PRETHODNE SJEDNICE OPĆINSKOG VIJEĆA

Nusret Dautović, predsjedavajući Općinskog vijeća: „Dobili ste Zapisnik sa 19. Redovne sjednice 7. saziva Općinskog vijeća Doboj Istok. Ima li neko primjedbi ili nešto da pita vezano za zapisnik sa prošle sjednice? Ukoliko nema, ko je za ovakav zapisnik?“

Glasanje: ZA – 13, PROTIV – 0, UZDRŽANIH – 0.

VIJEĆNIČKA PITANJA

Nusret Dautović, predsjedavajući Općinskog vijeća: „Ima li vijećničkih pitanja? Ukoliko nema vijećničkih pitanja prelazimo na dnevni red.“

USVAJANJE DNEVNOG REDA

Nusret Dautović, predsjedavajući Općinskog vijeća: „Prije sjednice mi smo dobili dvije tačke za proširenje dnevnog reda, pa ću vam ja pročitati koje su to dvije odluke:

U skladu sa članom 56. Poslovnika o radu Općinskog vijeća Doboj Istok predlažem da se u dnevni red Općinskog vijeća stavi sljedeća tačka:

1. Razmatranje Prijedloga Odluke o davanju na korištenje jedne prostorije u poslovnom prostoru općine Doboj Istok u Brijesnici Velikoj Asocijaciji srednjoškolaca u Bosni i Hercegovini.

2. Razmatranje zahtjeva Dioničkog društva BH Telekom Sarajevo za davanje saglasnosti za prekopavanje javne površine lokalnog puta u Brijesnici Maloj od Magistralnog puta Doboj – Tuzla do zgrade Mjesne zajednice Brijesnica Mala,

Ko je za da se ova prva tačku Razmatranje Prijedloga odluke o davanju na korištenje jedne prostorije u poslovnom prostoru općine Doboj Istok u Brijesnici Velikoj Asocijaciji srednjoškolaca u Bosni i Hercegovini uvrsti na dnevni red?

Glasanje: ZA – 13, PROTIV – 0, UZDRŽANIH – 0.

Ko je za da se tačka Razmatranje zahtjeva Dioničkog društva BH Telekom Sarajevo za davanje saglasnosti za prekopavanje javne površine lokalnog puta u Brijesnici Maloj od Magistralnog puta Doboj – Tuzla do zgrade Mjesne zajednice Brijesnica Mala uvrsti na dnevni red?“

Mehmed Mehinović, vijećnik SBiH: „Koristim priliku pošto ima puno gostiju da sve skupa poselamim i pozdravim i naravno kolegama i koleginicama zaželim uspješan rad. Prva tačka za mene nema dileme, a druga tačka proširenja dnevnog reda od BH Telekoma, zahtjev za prokopavanje javne površine je došao 05.07. Da li meni samo nije došla odluka koju ćemo donijeti ili je tehnička greška bila? Nema odluke uopšte i ne možemo donijeti odluku, ako nam nije ponuđena odluka, kao što je u prvoj tački dnevnog reda. Ne znam kako će izgledati odluka, koliko je to, kojim ide parcelama i kojim putevima? Da li ste vi dobili prijedlog odluke i samo meni nije došla? To je pitanje, ali nije upitno da se stavi na dnevni red.“

Omer Konjić i Adis Halilović su stigli na sjednicu Općinskog vijeća.

Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje: „ Poštovana gospodo vijećnici, poštovani načelnice evo dat ću obrazloženje. Dakle, ne radi se o prijedlogu odluke već će se donijeti zaključak na osnovu Odluke o služnosti puteva na području općine Doboj Istok. Zaključak bi glasio: Daje se saglasnost Dioničkom društvu BH Telekom Sarajevo da može izvršiti prokopavanje javne površine - lokalni put k.č. broj 2468/1 u dužni od 720 metara i broj 2470 u dužini od 80 metara KO Mala Brijesnica sa desne strane lokalnog puta van asfaltnog kolovoza radi polaganja kablovske kanalizacije u ukupnoj dužini od 800 metara. Dakle, ne radi se o donošenju odluke već se utvrđuje zaključak kao što ste radili i sa ostalim serviserima koji su podnosili zahtjeve.“

Emira Karić, predsjednica kluba vijećnika SDP: „ Pozdravljam sve prisutne. Samo bih zamolila gospodina predsjedavajućeg da nam jasno formuliše tačku dnevnog reda. Da li je to udovoljavanje zahtjevu, zaključak itd. Znači, sada morate jasno formulisati tačku dnevnog reda kako bi se mi odlučili da li prihvatamo ili ne takvo proširenje.“

Nusret Dautović, predsjedavajući Općinskog vijeća: „Javlja li se još neko za riječ. Od gospodina iz službe Hrnjičića smo dobili da ide kao zaključak koji je pročitao on ide u formi zaključka kako je on objasnio. Znači nije odluka, nego je zaključak kako smo saznali iz objašnjenja pomoćnika načelnika.“

Emira Karić, predsjednica kluba vijećnika SDP: „Predsjedavajući, kako jasno glasi tačka? Ne može tačka dnevnog reda glasiti zaključak.“

Nusret Dautović, predsjedavajući Općinskog vijeća: „Tačka je Razmatranje zahtjeva Dioničkog društva BH Telekom Sarajevo za davanje saglasnosti za prekopavanje javne površine lokalnog puta u Brijesnici Maloj od Magistralnog puta Doboj – Tuzla do zgrade Mjesne zajednice Brijesnica Mala. Može li sekretar da objasni?“

Omer Hadžić, sekretar općine: „ Pošto prvi put izlazim sve vas selamim i pozdravljam. Ovdje se razmatra zahtjev, a kako ćemo mi njega razmotriti i šta ćemo donijeti po tom zahtjevu, jer ako udovoljavamo zahtjevu donijet ćemo zaključak i ako ne udovoljavamo isto se donese zaključak da se odbija zahtjev za prokopavanje. To je vrsta akta koja će ishoditi donošenje po tom zahtjevu, a možemo i odustati od zahtjeva. To su varijante koje može donijeti Općinsko vijeće. Ovdje smo predložili proširenje, a tek sad pomoćnik ima prijedlog da se da odobrenje, jer smatra da su ispunjeni uslovi i zato je sada pripremljen ovaj zaključak koji treba Općinsko vijeće da donese da bi se moglo izvršiti prokopavanje. Naravno po tom aktu načelnik ima ovlasti da prati izvršenje poslova.“

Nusret Dautović, predsjedavajući Općinskog vijeća: „ Čuli smo objašnjenje sekretara općine. Ima li još neko da se javlja po ovome? Ako nema, ja stavljam na glasanje. Ko je za uvrštavanje ove tačke na dnevni red?

Glasanje: ZA – 15, PROTIV – 0, UZDRŽANIH – 0.

Pošto smo usvojili ove dvije tačke, ja predlažem da izmijenimo dnevni red tako da prijedlog Odluke o davanju na korištenje jedne prostorije u poslovnom prostoru općine Doboj Istok u Brijesnici Velikoj Asocijaciji srednjoškolaca u Bosni i Hercegovini bude tačka broj 3. a sljedeća tačka broj 4. tako da bi bilo pomijeranje ostalih tačaka.“

Emira Karić, predsjednica kluba vijećnika SDP: „Samo intervencija. Budući da je razmatranje zahtjeva, a znamo po važnosti kako idu prvo odluke, pa možda 5 minuta pauze pa da nam jasno služba ili sekretar posloži te tačke i da nam isprintate novi dnevni red da se možemo bolje snaći.“

Omer Hadžić, sekretar općine: „Moram reći da po našem Poslovniku nije određen redoslijed tačaka, a ovo je tradicija od ranijih kolegija da je po važnosti poredano. Imat ćemo to na umu kada budemo sljedeći Poslovnik pravili pa ćemo imati redoslijed tačaka da bude jasnije, jer su sada po Poslovniku sve tačke ravnopravne.“

Nusret Dautović, predsjedavajući Općinskog vijeća: „ Emira je predložila pauzu od 5 minuta i tehnički sekretar ako može da nam pripremi novi dnevni red kako sam ja predložio da idu nove tačke kao 3 i 4. a ostale da se pomijeraju. Pauza od 5 minuta.“

Sjednica je nastavljena u 10,20 sati.

Nusret Dautović, predsjedavajući Općinskog vijeća: „ Stali smo na usvajanju dnevnog reda i ja predlažem sljedeći dnevni red:

1. Razmatranje i usvajanje prijedloga Odluke o pristupanju izradi izmjene Regulacionog plana „Duje“ u Klokočnici
2. Razmatranje i usvajanje prijedloga Odluke o utvrđivanju javnog interesa za izgradnju elektroenergetskog objekta u Brijesnici Velikoj,
3. Razmatranje i usvajanje prijedloga Odluke o davanju na korištenje jedne prostorije u poslovnom prostoru općine Doboj Istok u Brijesnici Velikoj Asocijaciji srednjoškolaca u Bosni i Hercegovini
4. Razmatranje zahtjeva Dioničkog društva BH Telekom Sarajevo za davanje saglasnosti za prokopavanje javne površine lokalnog puta u Brijesnici Maloj od Magistralnog puta Doboj – Tuzla do zgrade Mjesne zajednice Brijesnica Mala,
5. Razmatranje i usvajanje Izvještaja o radu Javne ustanove za predškolski odgoj i obrazovanje „Dječija radost“ Doboj Istok za školsku/pedagošku 2021/2022. godinu,
6. Razmatranje i usvajanje Informacije o prinosima proljetne sjetve i pripremnim aktivnostima za jesenju sjetvu
7. Razmatranje i usvajanje Informacije o uspjehu učenika i postignutim rezultatima JU Osnovna škola „Klokočnica“ za 2021/2022. godinu
8. Razmatranje i usvajanje Informacije o uspjehu učenika i postignutim rezultatima JU Osnovna škola „Brijesnica“ za 2021/2022. godinu
9. Razmatranje i usvajanje Informacije o uspjehu učenika i postignutim rezultatima JU MSŠ Doboj Istok za 2021/2022. godinu
10. Razmatranje i usvajanje Informacije o upisu učenika u prve razrede JU OŠ „Klokočnica“ za 2022/2023. godinu
11. Razmatranje i usvajanje Informacije o upisu učenika u prve razrede JU OŠ „Brijesnica“ za 2022/2023. godinu
12. Razmatranje i usvajanje Informacija o upisu učenika u prve razrede JU MSŠ Doboj Istok za 2022/2023. godinu
13. Razmatranje zahtjeva za davanje saglasnosti za povećanje cijena usluga boravka djece u JU „Dječija radost“ Doboj Istok
14. Razmatranje Molbe Koalicije za zaštitu rijeka Bosne i Hercegovine za potpisivanje deklaracije „Općine bez brana“.

Ima li neko primjedbi na ovakav dnevni red? Ako nema, ko je za ovakav dnevni red?

Glasanje: ZA – 15, PROTIV – 0, UZDRŽANIH – 0.

REALIZACIJA DNEVNOG REDA

1. Razmatranje i usvajanje prijedloga Odluke o pristupanju izradi izmjene Regulacionog plana „Duje“ u Klokočnici

Nusret Dautović, predsjedavajući Općinskog vijeća: „Javlja li se neko po ovoj tački za riječ? Ukoliko se niko ne javlja ko je za usvajanje ove Odluke?“

Glasanje: ZA – 15, PROTIV – 0, UZDRŽANIH – 0.

2. Razmatranje i usvajanje prijedloga Odluke o utvrđivanju javnog interesa za izgradnju elektroenergetskog objekta u Brijesnici Velikoj

Nusret Dautović, predsjedavajući Općinskog vijeća: „Javlja li se neko po ovoj tački?“

Izet Hodžić, zamjenik predsjedavajućeg Općinskog vijeća: „Poštovani prisutni želim sve da vas srdačno poselamim i pozdravim i da poželim uspešan rad kolegama vijećnicima. Evo malo smo već termin probili što se tiče sjednice Općinskog vijeća, to nije bila praksa, ali nadam se da ćemo nastaviti. Što se tiče prijedloga Odluke malo smo i na klubu raspravljali o ovom prijedlogu odluke i ja sam, iskren da budem, malo i sa osobama koje su nadležne za ovu vrstu problematike razgovarao. Znači da prije svega kreiram svoj lični stav proučio sam prijedlog odluke da Općinsko vijeće donese odluku u kojoj se utvrđuje da su od javnog interesa radovi što se tiče objekta Belamioniksa u Brijesnici Velikoj da bi se prikopčali na trafo stanicu. Meni ono što smeta u ovom prijedlogu Odluke je tačka broj 3. jer sam pitao konkretno da li Općina ima kakvih obaveza prema ovome. Ako ste isčitali Elektroprivreda Bosne i Hercegovine je uputila zahtjev Općinskom vijeću da mi donesemo ovu odluku kako bi ona mogla nastaviti sa započetim aktivnostima i radovima. Znači ja sam pitao da li Općina, jer koliko je meni poznato do sada nije i po mom ličnom mišljenju ne treba da učestvuje što se tiče finansiranja ili sufinansiranja ovih projekata. Dobio sam informaciju da Općina iz svog budžeta ne učestvuje u tome, ali treba da donesemo ovu odluku i da proglasimo da je ovo od javnog interesa. Tačka broj 3. kaže: Naknada za utvrđivanje prava na nekretnini odredit će se posebnim rješenjem. Ako općina ne učestvuje u finansiranju ili sufinansiranju mislim da je ova tačka suvišna u ovom prijedlogu odluke. Ja mislim da će se i pomoćnik načelnika vezano za ovu problematiku javiti, ali ja mislim da ovaj član u ovoj odluci ne treba da stoji, jer ako to investitor ovog objekta finansira mislim da opština nema ništa sa tim. Znači naše je da donesemo ovu odluku da se utvrđuje javni interes, a kako će se oni dogovoriti sa investitorom, a izvođač u ovom slučaju je Elektroprivreda Bosne i Hercegovine, to je njihov problem. To je moje mišljenje.“

Mehmed Mehinović, vijećnik SBiH: „Naime, nama je svima poznato, pogotovo ovim koji su duže u Općinskom vijeću, da je moj lični stav uvijek bio da ako treba jedno radno mjesto da se otvori treba i Vijeće i izvršna vlast da se digne i da otprilike pomogne da se to riješi. Tako i ovom slučaju imajući u vidu da će ovaj privredni subjekat zaposliti toliko ljudi nije u pitanju da se glasa. Međutim želio bih zbog sebe lično neke nejasnoće da se razjasne. Ovo je jedna od rijetkih odluka, a donijeli smo odluku malo prije pod tačkom 1. izmjene Regulacionog plana i ima obrazloženje predlagača, jer uz svaku odluku treba biti obrazloženje predlagača i sugestija Vijeću iz kojih razloga da donesu odluku. Takođe ovo što smo proširili dnevni red za davanje na korištenje jedne prostorije ima obrazloženje predlagača. Nažalost uz ovu odluku nema obrazloženja predlagača gdje nam sugerise da donesemo, iz kojih razloga itd. Hoću da kažem da ova odluka obiluje nekim nejasnoćama. Naime, spominje se DMDE i ja pouzdano znam da je DMDE podnio Elektrodistribuciji zahtjev za priključenje sa onog tamo trafoa, a ne na ovaj i sada DMDE nema ništa sa tim faktički. Pored ovog što sam rekao znam da svaki investitor, ovo o čemu je moj prethodnik kolega Izet dopredsjedavajući govorio, završava to što treba da završi. Treća stvar, problem je ovdje što je ovaj čovjek nažalost preselio na bolji svijet prije 4 – 5 mjeseci i njega nema, vlasnika ovog objekta. Utvrđujemo opći interes, a ne znamo kako će reagovati ti ljudi. Međutim vlast treba donijeti opći interes i želim da to bude u skladu sa zakonom i propisima kako se donosi to. Belamioniks će vjerovatno riješiti svoj problem i oni trebaju da to otvore i da to počne raditi i da to funkcioniše, jer ljudi zaista rade dobro. Nije upitan moj glas

za ovu tačku, zaista nije upitan, ali hoću bar u zapisniku da se zapiše da sam sugerisao da u ovoj odluci ima dosta nejasnoća. Počev od ove prve da nema obrazloženja predlagača ove odluke, da treba da ide i da se obrazloži zbog čega i da se sugeriše kako da donesemo odluku do evo spominje se DMDE, a sada se investitor mijenja. Oni su počeli duboko da rade i treba im dati podršku. Glasat ću ja za ovu odluku nije upitno, međutim htio sam da iznesem primjedbe u vezi ove odluke, jer bi se moglo nešto eventualno pojaviti što ne bi bilo dobro i da se zna, neka stoji u zapisniku da sam predložio da se ova odluka dopuni sa ovim što treba da se dopuni. Što se mene tiče ja ću glasati za ovu odluku, međutim ona nije napravljena, po mom sudu, po našem Poslovniku i po Statutu onako kako treba da bude predložena odluka Općinskom vijeću.“

Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje: „ Ponovo se javljam da obrazložim u vezi ovih pitanja. Što se tiče pitanja gospodina Hodžića reći ću da odluke o utvrđivanju javnog interesa imaju svoju formu i one tačno moraju da sadrže ono što trebaju da sadrže kao što je navedeno u odluci. Što se tiče naknade, naknadu plaća predlagač, a Općina Doboj Istok samo utvrđuje javni interes. Znači to je u vašoj ingerenciji, a prema Statutu vi usvajate odluku o utvrđivanju javnog interesa, a poslije predlagač podnosi zahtjev za nepotpunu eksproprijaciju. Vodi se postupak, donese se upravni akt i tu se rješava pitanje naknade. To je što se tiče toga. Što se tiče pitanja drugog vijećnika reći ću vam da se projekat zove DMDE i tako traži Elektroprivreda Bosne i Hercegovine. Znači nisu htjeli da u svojim projektima i svojim knjigama i svojim rješenjima da mijenjaju naziv. Tačno je da se radi o privrednom subjektu Belamioniks. Što se tiče odluke o utvrđivanju javnog interesa sve odluke do sada koje su donesene od strane Općinskog vijeća su imale istu formu. Znači one se ne mogu mijenjati. To je upravni akt, odluka je upravni akt, odnosno opći akt i on ima svoju formu i ne može se tu tolerisati lijevo desno.“

Nusret Dautović, predsjedavajući Općinskog vijeća: „ Hvala. Javlja li se još neko za riječ? Ovdje imamo prijedlog Izeta Hodžića zamjenika, a Mehmed nam je samo objasnio i treba da se izjasnimo o Izetovom prijedlogu za skidanje ove tačke broj 3. Da li poslije objašnjenja pomoćnika načelnika ostaješ pri prijedlogu ili je prihvatljivo ovo objašnjenje?“

Izet Hodžić, zamjenik predsjedavajućeg Općinskog vijeća: „ Šefe, ne znam ja baš da li je propisano zakonom šta treba da sadrži. Ja mislim da se dobro razumijemo ako stoji u odluci, a mi prevashodno donosimo odluku o utvrđivanju javnog interesa i ne vidim apsolutno ni jedan razlog zbog čega bi ova tačka 3. trebala u prijedlogu, odnosno u konačnoj odluci da stoji. Znači investitor i Elektroprivreda sklapaju međusobni ugovor o naknadama. Ja sam privrednik i sa Elektroprivredom saradujem, pamože imati dvosmislen karakter ovaj član broj 3. Znači, mi smo tu da štitimo interese građana koji su nas izabrali u Općinsko vijeće i stoji da će se utvrditi, a ne piše ko će utvrditi, šta će, kako će i na koji način. Ovdje piše mi donosimo odluku, Općinsko vijeće i za mene je ova rečenica nepotrebna u ovoj odluci. Ja iznosim svoje lično mišljenje za mene je nepotrebna i ne vidim razlog, jer nikoga sigurno brisanjem ovog člana ili ove tačke nećemo ugroziti. Znači dovoljne su sasvim ove dvije tačke odluke da smo mi utvrdili da je ovaj projekat od javnog interesa i to je to. Kako će oni međusobne odnose rješavati i normalno nećemo mi njima sugerisati da li će oni praviti rješenje ili neće. Znači ja ostajem pri tome.“

Hasan Hasančević, predsjednik kluba vijećnika SDA: „Da vas sve poselamim pošto prvi puta izlazim. Znači mi možemo donijeti odluku i ne donijeti. Možemo je mijenjati ako neko predloži ako nam se nešto ne sviđa, a da li ćemo imati pravnih posljedica to je nešto nebitno. Ali da podsjetim da usvajamo zapisnik sa prethodne sjednice Vijeća. Ovdje je jasno za govornicom pomoćnik načelnika rekao da Općina ne plaća taj dio. Znači nema troškova i mi to usvojimo poslije i to ulazi u zapisnik i vrijedi nam kao bilo koji dokument bilo gdje ako dođe do zloupotrebe odluke koju donesemo. Tako da ne vidim razloga zašto bi mijenjali ako je pomoćnik objasnio da ne treba mijenjati.“

Mehmed Mehinović, vijećnik SBiH: „Ja dozvoljavam ovo što je pomoćnik načelnika rekao da otprilike po zakonu ide eksproprijacija tako i tu nema dileme, propisano je tako i toga se treba držati. Međutim ja sam upozorio na nekoliko stvari, ali predsjedavajući, nije trebalo stavljati stvari koje apsolutno nemaju veze. Kaže omogućit će se kvalitetnije snabdijevanje električnom energijom stanovnika datog lokaliteta i Belamioniksa i omogućiti priključenje novih kupaca kao Belamioniksa. Ovo nema veze sa stanovnicima, ovo je za Belamioniks i treba reći tako da treba Belamioniksu i ljudi idemo u to i stat ću pred koga hoćeš i reći ovo treba dati. Nema veze sa stanovnicima, ovo se radi za Belamioniks da ima snabdijevanje. Tako kažu stručnjaci i ne treba bacati prašinu u oči. Izglasat ćemo takvu odluku, ali potegle su se neke stvari, pa da i to pojasnim.“

Kemal Bratić, općinski načelnik: „ I ja vas sve srdačno selamim, a posebno naše goste koji će očitno malo duže čekati. Meni je ova odluka posve jasna i ko je htio da čita ima i obrazloženje zašto se ona donosi. Međutim to su naša posla da mi unaprijed nešto šta će biti i kako će biti, a neće u suštini ništa promijeniti ono što je na terenu. Šta je ovdje bitno? Bitno je da se pojavio novi vlasnik koji je kupovinom određenog objekta preuzeo i ovu započetu proceduru. Ja se nadam da se Adis neće naljutiti. Nije ovo zbog Belamioniksa ovo je, po meni, zbog nakaradne procedure naše Elektroprivrede. Adis razumije o čemu ja govorim, jer oni su to tražili nije to tražio Belamioniks. Da bi oni ušli u izvođenje radova mi moramo donijeti odluku i nije to prvi puta i vjerovatno neće biti ni posljednji put. Šta je ovdje bitno? Ovdje je bitno da mi otkočimo i da to ne bude do nas, da neko ne može uprijeti prstom kao što je prije upirao prstom da Općina koči, a mi dali sve dozvole, dali urbanističku, dali građevinsku i nikakve kočnice nije bilo. Evo ni sada je nema i trudimo se i treba da se trudimo da otkočimo to. To je trebalo davno da bude riješeno. Međutim zbog nekakvih okolnosti koje su tamo bile nije se to desilo. Da li treba ova treća tačka ili ne treba? Abdulah, ako ne treba da je skinemo da ne mlatimo džaba praznu slamu, mislim da ona ništa ne mijenja, jer ovo je samo prvi korak, a poslije dolaze akti koji će se donositi i usvajati. To će služba raditi zajedno sa Elektroprivredom, jer Elektroprivreda je nosilac ovih radova. Ko će platiti? Normalno da neće općina platiti. Da li će biti bolje građanima? Hoće biti, jer neće biti jedan takav objekat priključen na neki drugi trafo, nego će se za njega izgraditi novi. Znači olakšat će. Sve je to na neki način jedna lijepa priča, kao što neko reče, novih 50 radnika i treba da radimo u tom pravcu. Kada vidim da džaba raspravljamo o nekim stvarima ja sam za to da se ova tačka 3. skine, kao što je Izet predložio, jer ona nama ništa ne mijenja u ovoj odluci. Je li tako Abdulah? Evo da završimo sa time i da otkočimo Elektroprivredi, ne Belamioniksu. Elektroprivreda je investitor, a platit će naravno onaj ko se bude prikopčavao.“

Nusret Dautović, predsjedavajući Općinskog vijeća: „ Hvala načelniče. Javlja li se još neko za riječ? Ko je za prijedlog Odluke sa prijedlogom Izeta Hodžića da se tačka 3. briše?“

Omer Hadžić, sekretar Općine: „ Pošto je predlagač izmijenio svoju Odluku ide bez toga i nema više amandmana. Znači predlagač je prihvatio prijedlog i ide bez tačke 3.“

Nusret Dautović, predsjedavajući Općinskog vijeća: „ Ko je za prijedlog Odluke bez tačke 3?“
 Glasanje: ZA – 15, PROTIV – 0, UZDRŽANIH – 0.

3. Razmatranje i usvajanje Prijedloga Odluke o davanju na korištenje jedne prostorije u poslovnom prostoru općine Doboj Istok u Brijesnici Velikoj Asocijaciji srednjoškolaca u Bosni i Hercegovini

Nusret Dautović, predsjedavajući Općinskog vijeća: „ Javlja li se neko po ovoj tački za riječ? Ukoliko se niko ne javlja ko je za ovakav prijedlog Odluke?“

Glasanje: ZA – 15, PROTIV – 0, UZDRŽANIH – 0.

4. Razmatranje zahtjeva Dioničkog društva BH Telekom Sarajevo za davanje saglasnosti za prokopavanje javne površine lokalnog puta u Brijesnici Maloj od Magistralnog puta Doboj – Tuzla do zgrade Mjesne zajednice Brijesnica Mala

Nusret Dautović, predsjedavajući Općinskog vijeća: „ Javlja li se neko za riječ? Ko je za ovakav zaključak?“

Glasanje: ZA – 15, PROTIV – 0, UZDRŽANIH – 0.

5. Razmatranje i usvajanje Izvještaja o radu Javne ustanove za predškolski odgoj i obrazovanje „Dječija radost“ Doboj Istok za školsku/pedagošku 2021/2022. godinu,

Nusret Dautović, predsjedavajući Općinskog vijeća: „ Javlja li se neko za riječ po ovoj tački?“

Emira Karić, predsjednica kluba vijećnika SDP: „ Prije svega čestitke direktorici Jasmini na mandatu i sve najbolje u radu. Ja se tradicionalno javljam kada je u pitanju ova tačka dnevnog reda i tradicionalno ću se javljati ako budemo dobijali u materijalima ovakvu vrstu izvještaja. Uvijek je pohvaljen ovaj izvještaj i čak idem do te mjere da kažem da se neko treba ugledati na urnek kada su izveštaji u pitanju, odnosno kada idu

prema Vijeću. Mogu raspravljati na dugo i naširoko, znači zaista sve je objašnjeno. Ja čitam te izvještaje i drago mi je kada s nekim razgovaram o predškolskom odgoju, odnosno o vašem vrtiću, jer sam upoznata i mogu garantovati za neke informacije, jer sam ih pročitala. Malo ću proći kroz taj izvještaj, jer iskreno rečeno mene je obradovala rečenica u izvještaju gdje kažete da na spisku za čekanje djece za upis u obdanište nije bilo više ni jedno dijete. To je zaista veliki pomak i nadam se da će se to i nastaviti. Drago mi je kada svi roditelji imaju priliku, kada se ne mučeni 24 sata ako dobiju neki posao, ako se zaposle, jer onda je uvijek problem oko čuvanja djeteta. Vjerujem da će oni i na dalje rješavati ekspresno takve probleme. Ovdje govorite i za logopeda, naravno veliki je pomak urađen općenito na općini Doboj Istok kada je načelnik nakon nekih diskusija, je li tako, opet povodom nekih tačaka, dao prijedlog da se pri Centru za socijalni rad uposli taj logoped, jer on nam zaista puno znači. Govorite da on dolazi u obdanište da je otprilike detektovao 12 djece, ali i još više. Možda bi to samo trebalo biti kao tačka dnevnog reda, jer zaista nosimo se sa ogromnim problema kada su u pitanju djeca sa govornim poteškoćama. Ja radim evo koliko radim, da ne otkrivam ni godine ni broj staža, ali postojale su godine u školi, školskoj godini, kada nije bilo ni jedno dijete sa poteškoćama u govoru ili jedno dijete. Ovo je sad određena pošlica. Jako puno djece se upisuje u školu i vjerujem da će se ta problematika rješavati kroz vrtiće. Smatram da to treba institucionalno rješavati i smatram da se treba uraditi ekspertiza u vrtićima i u školama koji je to broj djece i na kraju krajeva otkriti uzrok kako bi se djelovalo preventivno da li kod roditelja, porodice itd. Smatram da ćemo se u budućnosti ovom problematikom itekako baviti. Takođe kažete da je obavezan program predškolskog odgoja za djecu pred polazak u osnovnu školu i navodite da niste mogli naći više zaposlenika. Neću da slutim, ali mislim da će biti problema i ove školske godine, jer prema izmjenama standarda u osnovnoj školi mnogi su profesori razredne nastave, hvala Bogu, dobili posao. Potrebe će biti za taj mjesec maj juni da se uposle za taj predškolski odgoj. Ja ovdje samo govorim, koliko mene ko sluša ili koliko je ko kompetentan, da se na vrijeme reaguje da se određeni pravilnici izmijene. Mislim da će to morati ići možda i pod neki honorarni posao određenih zaposlenika koji rade u nekim drugim ustanovama. Neću da prejudiciram, vidjet ćemo kako ćete rješavati tu problematiku. Ovdje sam takođe pročitala Upravni odbor je imao 7 sjednica i to je za mene jako pohvalno. Znači i Upravni odbor raspravlja o problemima, a i vidi se prema ovom izvještaju. Kažete da koristite svaku priliku da poboljšate uslove boravka djece u obdaništu i kažete da roditelji uviđaju značaj i vrijednost boravka djece. Takođe i sredina uviđa, pogotovo ta razredna nastava, odnosno u prvom razredu zaista se uviđaju ta djeca koja su u tim ustanovama, jer socijalizacija je bolja i da ne nabrajam. Međutim i ovo se treba institucionalno rješavati, mislim da trebaju veće subvencije kada su u pitanju plaćanja i da se zaista određene kategorije skroz oslobode plaćanja obdaništa, odnosno preko drugih institucija. Kažem trenutno nismo na Vijeću kompetentni i to je samo neki moj apel. Jedna isto tako rečenica za čestitiku: Trenutno naša ustanova nema nikakvih slabosti kada je u pitanju naslov slabosti ustanove. Pohvalno, jer inače sve ustanove u razgovoru ističu određene slabosti, bave se sa mnogim problemima, tako da kad dođete na nivo da se kaže da nema nikakvih slabosti to je perfekcija. Kada ste navodili ciljeve koji se ostvaruju, odnosno ciljevi spoznajnog razvoja malo ću se kao menadžer vama obratiti pod dijelom razvoj divergentnog mišljenja putem rješavanja problemskih zadataka, razvoj sposobnosti induktivnog i deduktivnog zaključivanja i ovo je samo navedeno između ostalih 10 – 15 ciljeva, a ja bih ovo formulisala kao jedan veoma značajan cilj. Znači problemski zadaci, odnosno problemsko učenje i razvoj takvog induktivnog i deduktivnog mišljenja treba da nam bude osnovna zadaća. Sve je veća problematika u školama da djeca jednostavno teže zaključuju, a cijeli sistem se svodi, državni sistem se svodi da obrazujemo dijete koje će znati rješavati problemske zadatke, odnosno imati to induktivno i deduktivno mišljenje. Tako da i ja koristim to u svom razredu bez obzira što me nastavni plan i program vodi sadržajem nekim širim ja se uvijek vratim na te neke problemske zadatke i tražim od učenika da ih rješavaju kako bi se danas sutra snalazili bolje u životu. Imala sam još nekih rečenica kroz materijal, ali završit ću, želim vam ovakav rad i u ovoj godini.“

Mehmed Mehinović, vijećnik SBiH: „Ima nekih izvještaja preko kojih ja jednostavno ne mogu preći u ovoj općini i moram se javiti. U ovom dijelu pozitivno naravno, neću kritikovati, jer koga god šta interesuje za dječije obdanište može naći u ovom izvještaju zaista i ne bih sada prepričavao. Direktorice, želim ti sreću, naravno neće ti biti lako, ljestvica, odnosno level je podignut i valja to prebaciti, jer je prethodna direktorica odlično radila. Hoću da se javim za riječ iz razloga što smo se mi u općini često, od '98. godine pa na ovamo, izvršna i predstavnička vlast, hvalili sa dječjim obdaništem. Mi smo bili jedni od rijetkih koji smo imali dječije obdanište, da znate, jer ni u gradovima nisu bila dječija obdaništa, a u ovako ruralnoj jednoj općini bilo je dječije obdanište. Zato ono zaslužuje pažnju da mu pomognemo i ja čestitam izvršnoj vlasti u tom dijelu što su pomogli prethodnom periodu. Želim da nastave taj podsticaj kakav je bio do sada, jer oni su nešto što je perspektiva, što je budućnost, što nam djecu usmjeravaju u pravom pravcu i drago mi je. Ona generacija

gdje sam ja bio čuvala je to obdanište kada je bilo 9 djece, kada je bilo 12 djece, kada su bili teški finansijski problemi. Ova generacija, direktori menadžment, su napravili iskorak i to je zaista puno i meni je drago da nema na čekanju. Međutim želim da se poboljšava i ova materijalna situacija i direktorice želim ti svako dobro, bit će uspeha ako održiš ovako kao što je bilo, a ja lično ne sumnjam u to.“

Kemal Bratić, općinski načelnik: „Lijepa diskusija vijećnice Emire i ja predlažem da se uključi u volonterski rad u obdanište, jer ima dobrih stvari koje je ovdje rekla. Kao što Meho reče sjećamo se mi perioda i kada nije bilo ovako, kada je bilo dosta ideja da se to ugasi, da se zaključa, da se privatizuje. Evo mi smo to uspjeli odbraniti i kada je bilo onih protiv toga da se obdanište zaduži, a taj kredit je već izašao. Ja hoću da me sadašnja direktorica ne shvati krivo, ali ovo je izvještaj prethodne direktorice i želim da iskažem svoje zadovoljstvo sa saradnjom koju sam sa njom ostvario. Iskreno se nadam da će ova biti još bolja. Ono što smo imali za cilj jeste da smo naše obdanište stavili na stabilne noge, izvukli iz nekakvih dugovanja i evo poravnali ono što je trebalo da se poravna i oni sada, hvala Bogu dragom, funkcionišu, naravno opet uz našu pomoć da li kroz projekte, a davanja iz budžeta neću da pominjem, jer to je naša obaveza kao osnivača. Oni su dokaz kako se može domaćinski raditi i kako se može iz debele dubioze koja je bila nekada davno, da to ustabilimo i da sa današnjim danom koliko ja znam, direktorica je neki dan kod mene bila, nemaju nikakvih dugovanja. Imaju većinom riješenu infrastrukturu, ostalo je još par sitnica da u narednom periodu riješimo i evo otvoren smo servis za naše građane. O ovome što je Emira govorila o subvenciji, ne bih ulazio u te stvari kome davati, jer moramo odrediti kriterije. Ako ja i supruga radimo, pa vodimo dijete, da li nama treba dati subvenciju? Znači to je duboka tema i bez nekakve dubinske analize ne trebamo je ovdje, po meni, ni otvarati. Logoped, pomoć preko Centra za socijalni rad, mi smo imali radionice i nedavno smo završili i ući ćemo u drugi projekat gdje radimo sa Emmausom i radionice gdje je naravno učestvovao i UNDP sa određenim sredstvima, općina Doboj Istok i Emmaus gdje smo radili za naše korisnike. Slažem se sa Emirom te usluge je koristilo 35 djece i na to se trebamo svi bazirati, sve naše ustanove, a pogotovo čiji smo mi osnivači, da upremo u dušu tim ljudima kojima to puno znači da djeca prisustvuju jednom ili dva puta sedmično na tim radionicama. Evo imamo dobre povratne informacije i ako Bog da nastaviti ćemo to i u ovoj godini. Da ne dužim kao neki prije mene i ovoj direktorici želim uspješan rad, našim polaznicima obdaništa naravno puno zdravlja i da nastavimo istim trendom. Evo iskreno da prenesete selame i prethodnoj direktorici koja je zajedno sa svima nama, na neki način, udarila zdrave temelje našeg obdaništa, a vi ćete to, ako Bog da, nastaviti u narednom periodu.“

Nusret Dautović, predsjedavajući Općinskog vijeća: „Hvala lijepo. Javlja li se još neko za riječ po ovoj tački? Ukoliko se ne javlja ko je za usvajanje Izvještaja?“

Glasanje: ZA – 15, PROTIV – 0, UZDRŽANIH – 0.

6. Razmatranje i usvajanje Informacije o prinosima proljetne sjetve i pripremnim aktivnostima za jesenju sjetvu

Nusret Dautović, predsjedavajući Općinskog vijeća: „Javlja li se neko za riječ po ovoj tački? Ukoliko se ne javlja ko je za ovakvu informaciju?“

Glasanje: ZA – 15, PROTIV – 0, UZDRŽANIH – 0.

7. Razmatranje i usvajanje Informacije o uspjehu učenika i postignutim rezultatima JU Osnovna škola „Klokotnica“ za 2021/2022. godinu

Nusret Dautović, predsjedavajući Općinskog vijeća: „Po ovoj tački javlja li se neko za riječ?“

Emira Karić, predsjednica kluba vijećnika SDP: „Dobili smo zaista sadržajnu Informaciju uspjehu učenika i postignutim rezultatima JU Osnovna škola „Klokotnica“. U informaciji se navodi da je srednja ocjena na nivou škole u 2021/2022. godini 4,29 što je jako dobra srednja ocjena i čestitke na njoj. Ja bih samo postavila pitanje direktoru imali većih odstupanja od srednje ocjene na kraju školske godine učenika 9 razreda i srednje ocjene eksterne mature iako je i to široka tema? U informaciji se može pročitati širok spektar različitog stručnog usavršavanja, kao i tema koje su nastavnici pripremili i realizirali na stručnim aktivima. Pohvale za cjelokupnu organizaciju općinskih takmičenja, jer pokazali ste se kao profesionalci i pokazaliste određenu srdačnost kao domaćini. Čestitke svim učenicima i mentorima koji su pripremali učestvovanje na općinskim i kantonalnim takmičenjima. Takođe imali ste učenicu koja je imala učešće na federalnom takmičenju. Vjerujte mi koliki je to radi koliko to zahtjeva energije tako da opet kažem sve

čestitke. Treba raditi, treba puno puno raditi na motivaciji samih učenika i mentora kako bi postizali što bolji uspjeh, prvo na kantonalnim, a na federalnim takmičenjima da i ne govorim, je konkurencija je zaista jaka. Kada neko iz sredine koja nije gradska uspije i učestvovati na takmičenju ja to respektiram itekako. Budući da sam ove godine bila u centralnom objektu kada su bili stari podovi i namještaj vjerujte mi da sam dugo imala osjećaj gorčine. Zato mi je izuzetno drago da je realiziran projekat zamjene podova i namještaja i sve čestitke i hvala svima koji su učestvovali u tom projektu. Ovdje navodite prioritete za narednu školsku godinu, lijepo su navedeni ti prioriteti, odnosno to je za ovu školsku godinu, koji će u svakom slučaju povećati uspjeh učenika. Da kratko kažem to je: pojačati rad na časovima odjeljske zajednice, pojačati dodatnu nastavu, nastavu sa nadarenim, angažovati logopeda u školi, više izleta, veći angažman kroz rad sekcija takmičarskog karaktera itd. JU Osnovna škola „Klokotnica“ ima dobar kolektiv i čestitam na dosadašnjem uspjehu i takođe bih željela da se saradnja zajedničkih aktiva Osnovne škole „Brijesnica“ i Osnovne škole „Klokotnica“ nastavi i u ovoj školskoj godini.“

Dženad Mujkić, direktor JU Osnovna škola „Klokotnica“: „ Ja bih iskoristio priliku da vas pozdravim i da se zahvalim na pozivu prije svega i na lijepim riječima na račun OŠ „Klokotnica“ i njenog kolektiva i svega onog što ona čini. Naravno uvijek može bolje i treba težiti boljem. A osnova svih nas u prosvjeti koji se bavimo tim poslom je povećanje obima i uspješnosti odgojno obrazovnog rada. Sada smo pomenuli tamo neka zapažanja kroz potrebe logopeda i svega ostalog. Zaista tu ima puno da se radi prije svega na edukaciji roditelja i samih nas i naše obaveze kao nastavnika u kom pravcu treba da se kreće to naše obrazovanje bez obzira što nekad ti nastavni planovi i programi nemaju osjećaj stvarnog stanja na terenu. Tako da evo toliko ne bih puno dužio i hvala još jedanput na čestitkama.“

Nusret Dautović, predsjedavajući Općinskog vijeća: „ Hvala lijepo direktoru. Javlja li se još neko za riječ? Ko je za usvajanje ovakve Informaciju?“

Glasanje: ZA – 15, PROTIV – 0, UZDRŽANIH – 0.

8. Razmatranje i usvajanje Informacije o uspjehu učenika i postignutim rezultatima JU Osnovna škola „Brijesnica“ za 2021/2022. godinu

Nusret Dautović, predsjedavajući Općinskog vijeća: „ Javlja li se neko za riječ?“

Emira Karić, predsjednica kluba vijećnika SDP: „Moram biti iskrena i reći da sam razočarana poslanim materijalom kada je ova tačka u pitanju škole iz koje dolazim. Ako se bukvalno shvata dobili smo tri lista informacije o uspjehu učenika, ali uspjeh učenika nikako ne podrazumijeva samo prikazane brojke prolaznosti, a postignuti rezultati se ne odnose samo na navođenje mjesta učenika na takmičenjima. Dozvolit ćete mi budući da imam pravo na diskusiju od 5 minuta da proširim ovu informaciju. Želim prije svega da se zahvalim svim zaposlenicima škole na velikom angažmanu i radu u prošloj godini. Obilježeni su svi značajni datumi putem radionica, izložbi i priredbi. Čini mi se da je prvi puta bila priredba u centralnoj i područnoj školi povodom završetka školske godine. Učenici su na ovaj način sumirali svoja zalaganja. Održana je svečana akademija povodom Dana nezavisnosti u realizaciji svih škola naše općine. Održana je jako kvalitetna priredba povodom Dana škole sa propratnim sportskim aktivnostima. Održane su radionice za roditelje, stručna usavršavanja nastavnika, ogleđno ugledni časovi, svi časovi dopunske nastave i zahvaljujem se svim nastavnicima i pedagogici na profesionalnoj organizaciji školskih takmičenja. Čestitke učenicima na postignutim rezultatima. Svi učenici škole umjesto posjete kinu kao do sada su posjetili pozorište u Tuzli. Veliki broj učenika je prvi puta bio u pozorištu. Posjetili smo muzej ratnog detinjstva u Sarajevu, Muzej Franca Ferdinanda. Učenicima su organizirane besplatne ekskurzije u Sarajevo i Srebrenicu. Mislim da smo jedina škola u Tuzlanskom kantonu koja je organizirala dvije besplatne ekskurzije. Imali smo prelijepo veče i druženje sa našim maturantima. Konstantno je rađeno na poboljšanju uslova rada u školi i to sportska dvorana, stolarija u dvorani, poboljšanje svjetlosti u dvorani i pred dvoranom, kupovina velikog bojlera kapaciteta za sve svlačionice, osposobljavanje i uređivanje svlačionica i drenaža ispred dvorane. Centralna škola – utopljavanje kompletnog objekta sa promjenom limarije, postavljanje trakastih zavjesa i žaluzina u kompletnom objektu, zamjena masnih boja na zidovima prvog sprata kulirnom bojom, rekonstrukcija unutrašnje bine u velikoj učionici, opremanje kabineta muzičke kulture kvalitetnim instrumentima za školski bend. Prva multimedijalna učionica, - uvođenje interneta u kabinet informatike, postavljanje panoa po hodnicima i učionicama. Područna škola – rekonstrukcija vanjske bine, multimedijalna učionica. Takođe je započet projekat kupovine kancelarijskih i konferencijskih

stolica, te zamjene podova u zbornici i kancelarijama. Bilo je određenih problema sa realizacijom tog projekta, te ovaj projekat još uvijek nije realiziran. Puno se radilo na promociji sporta u našoj sportskoj dvorani, održana je međunarodna rukometna utakmica, rukometne utakmice premijer i federalne lige, turniri u futsalu. Prioriteti za ovu školsku godinu, pojačati rad na časovima odjeljenske zajednice, pojačati kvalitet dodatne nastave, povećati broj multimedijalnih učionica, promjena podova u centralnoj školi, presvlačenje poligona u centralnoj školi i najveći prioritet dobivanju potrebne dozvole za dvoranu kako bi učenici u Centralnoj školi izvodili kvalitetnu nastavu tjelesnog i zdravstvenog odgoja. Još jednom pohvale svim uposlenicima JU Osnovna škola „Brijesnica“.

Izet Hodžić, zamjenik predsjedavajućeg Općinskog vijeća: „Neću ništa posebno samo bih pročitao kako glasi tačka dnevnog reda: Informacija o uspjehu učenika i postignutim rezultatima za školsku 2021/2022. godinu i Informacija o upisu učenika za školsku 2022/2023. godinu, odnosno prvi dio ove informacije je informacija uspjehu učenika, apostrofiram, i postignutim rezultatima za školsku 2021/2022. godinu, to je naziv tačke dnevnog reda.“

Kemal Bratić, općinski načelnik: „Evo i ja želim da se pridružim ovoj Izinoj konstataciji sa kojom se u potpunosti slažem. Ono što želim, a evo čuo sam određeni dio diskusije, da čestitam direktoru na ovome svemu što je uradio u prethodnom periodu pored svih evo nekih peripetija koje su bile, stresova koje je vjerovatno doživio, pritisaka i prijetnji. Želim da kažem da će imati punu podršku mene kao načelnika, a vjerujem i ove općinske većine. Meni je jasan naziv tačke dnevnog reda. Škola u Velikoj Brijesnici uz pomoć većinom sredstava iz budžeta Općine Doboj Istok i sredstava koja smo našli na nekim drugim nivoima. Isti je slučaj i sa Osnovnom školom „Klokotnica“ i sa srednjom školom. U prethodnom periodu općina Doboj Istok je započela ovu prelijepu sportsku dvoranu i evo završavamo određene procedure da i to završimo i to je ono na šta trebamo svi biti ponosni. Šta je neko pojedinačno uradio ili nabavio, to je, da me neko krivo ne shvati, manje bitno. Mislim da kao tim i kao ekipa možemo sve naše institucije voditi u jednom pravom smjeru i pravom pravcu. Tebi direktore čestitam, do sada si dosta uradio i imat ćeš našu podršku, ako Bog da, i u budućem periodu sve ono što budu zahtjevi Osnovne škole „Brijesnica“ da pokušamo zajedničkim snagama i da završimo.“

Edin Mrkanović, direktor JU Osnovna škola „Brijesnica“: „Prije svega da vas sve srdačno pozdravim. Nisam mislio da ću se javljati, ali nakon što je načelnik čestitao red je da se zahvalim i da iskažem zadovoljstvo na našoj dosadašnjoj saradnji i nadam se da ćemo takvu saradnju i nastaviti. Što se tiče našeg izvještaja mi smo se vodili onim što ste od nas tražili. Tražena je informacija i mi smo to tako i napisali. U suštini u odnosu na druge izvještaje jeste šturo, ali ono što je traženo tako je i dostavljeno. Ako vi želite neku detaljniju informaciju onda to treba tako i da se navede. Svaka ustanova vjerovatno ima svoj urnek, a naša škola mislim da godinama šalje ovakav izvještaj, tako da ne znam u čemu je sada problem. I za vašeg mandata je izvještaj bio isti. Ja koliko znam jest. Pedagogica je više upućena, iako zajedno radimo taj izvještaj, a radili ste ga i vi zajedno sa njom tako da ne znam čemu ovo sve. Zahvaljujem se.“

Emira Karić, predsjednica kluba vijećnika SDP: „Evo gledam vas sve uoči i zaista ne znam o čemu je problem. Ja sam se javila i na tački Osnovna škola „Klokotnica“ itekako sam pohvalila ono što je urađeno i što sam ja znala da je urađeno. Dotakla sam se i oglednih časova i tema za roditelje i radionica i takmičenja i pohvalila ono što je bio zaista interventni projekat. Još jedanput zahvaljujem se u ime učenika koji idu u centralnu školu za izmjenu podova i učeničkog nameštaja. Poslije te moje diskusije niko nije reagovao, a ne znam u čemu je problem da se reaguje nakon takođe određenih u istom smjeru rečenih informacija kad je u pitanju Javna ustanova Osnovna škola „Brijesnica“. Vama vaše sujete, a ja nastavljam ovako kako nastavljam.“

Kemal Bratić, općinski načelnik: „Ja se nadam da nije moja diskusija izazvala ovu reakciju. Kada govorimo svi smo evo na neki način praktičari. Kada govorimo o informaciji i izvještaju ja kada izlazim ovdje mogu pričati samo o tom materijalu. Ja neću izaći pa reći mi smo uradili fasadu, a pričamo o informaciji o uspjehu učenika. Nije lijepo, uzimate nam vrijeme. Ako neko želi da se samo promoviše neka otvori nekakvu zvaničnu stranicu na fejbuku i neka se hvali. Znači govorimo o ovome što je ustanova dostavila ovdje i o tom materijalu treba da pričamo, a ne o promociji ili samopromociji bilo koga ovdje pojedinačno.“

Emira Karić, predsjednica kluba vijećnika SDP: „Mislim da ste se već navikli da vam ne oduzimamo vrijeme. Kada je u pitanju poboljšanje kvaliteta školstva sramota je reći da je to nečija promocija. To je poboljšanje kvaliteta života i svi moramo raditi na poboljšanju kvaliteta Doma zdravlja, vrtića, Centra za socijalni rad i ja ću itekako slušati sve diskutante i neka probijaju termine koji rade na poboljšanju kvaliteta života ljudi na našoj općini, pa i šire.“

Kemal Bratić, općinski načelnik: „O tome nemojte meni pričati. Ako je iko, mogu slobodno ovdje reći, uložio i svoje vrijeme i trud i zalaganje za poboljšanje uslova u našem osnovnom i srednjem obrazovanju to sam ja. Ima još naravno nisam samo ja, jer svi radimo na tome, ali dajte da stavimo tačku dnevnog reda vezano za poboljšanje, pa ćemo onda vidjeti ko je šta uradio. Jednom da stavimo nekakvu tabelu u ovih 10 godina šta smo sve uradili na obrazovnim objektima. Dobro ste me napomenuli. Neki dan smo potpisali ugovor vezano za popravljavanje stanja u Domu zdravlja, znači utopljanje. Vrijednost projekta je 180.000 i mi svakodnevno radimo. Završili obrazovne i sada idemo na zdravstvene ustanove. Neki dan smo završili toplifikaciju ambulante u Brijesnici Velikoj i napadamo dalje. Ako pričamo o informaciji i uspjehu učenika, dajte da pričamo o tome. Valjda smo jasni.“

Emira Karić, predsjednica kluba vijećnika SDP: „Gospodine načelniče, ja bar mislim da kod mene nema ni najmanjeg djelića nekog negativnog ponašanja. Naravno sada ste me podsjetili, jednom u godini imamo ove vrste informacija, a bit će i o upisu učenika, podsjetili ste me da kažem da općina zaista vodi računa o školstvu na općini Doboj Istok. Može se vrlo lako reći nije naša ingerencija, vrlo lako. Ako ćemo to, opet kažem, bukvalno shvatati. Ja u životu ništa bukvalno ne shvaćam, kod mene uvijek ima level prvi, drugi, treći itd. Zaista ste počeli na početku svog mandata jednu lijepu priču kada je obrazovanje i kvalitet obrazovanja u pitanju na području općine Doboj Istok. Iskreno pratila sam materijale i iz susjednih općina, ulaže se ne mogu reći da smo jedini primjer, općine ulažu u obrazovanje i ja se zahvaljujem i vama i svakom načelniku koji upravo to radi. Naravno i resurs ljudski je veoma bitan u kvaliteti uspjeha učenika, ali naravno i da učenicima pružimo sve uslove koje možemo, jer tako ulaganje u obrazovanje je ulaganje u državu i to je nama svima jasno.“

Nusret Dautović, predsjedavajući Općinskog vijeća: „Hvala lijepo. Javlja li se još neko za riječ? Ko je za ovu Informaciju?“

Glasanje: ZA – 15, PROTIV – 0, UZDRŽANIH – 0.

9. Razmatranje i usvajanje Informacije o uspjehu učenika i postignutim rezultatima JU MSŠ Doboj Istok za 2021/2022. godinu

Nusret Dautović, predsjedavajući Općinskog vijeća: „U dosadašnjoj praksi je bilo da ukoliko nema izvjestioca da tačku skidamo sa dnevnog reda. Ima li neko ispred srednje škole? Da li se slažete da skinemo ovu tačku dnevnog reda?“

Kemal Bratić, općinski načelnik: „Ja nisam za to da skidamo tačku sa dnevnog reda, jer nam se dešavalo i u nekom prethodnom periodu da predlagatelj nije bio prisutan i da smo tačku ostavili i raspravljali. Ja sam za to da raspravljamo i da usvojimo ili ne usvojimo, jer ako je sada skinemo sa dnevnog reda opet će nas čekati na nekom narednom Vijeću. U suštini mi ništa ne gubimo, naravno to je moje mišljenje, a vi ga možete promijeniti kao općinski vijećnici. Mislim da nema potrebe da skidamo sa dnevnog reda, jer trebamo raspraviti o tome, a mislim da bi možda trebali čak i tematsku sjednicu zakazati povodom dešavanja u srednjoj školi. Po informacijama koje ja imam stanje uopšte nije dobro da nema ko da rukovodi školom da neke stvari štekaju i zato bi trebali iskoristiti priliku da diskutujemo o ovoj tački dnevnog reda.“

Izet Hodžić, zamjenik predsjedavajućeg Općinskog vijeća: „Ja ću samo akcenat staviti na ovo „skidanje“ ili „ne skidanje“ sa dnevnog reda. Znači uobičajena je praksa do sada bila, evo maltene kako sam ja u Vijeću, znači nigdje to ne piše u Poslovniku ili pravilniku, ali znači uobičajena je praksa bila. Ja sam na pola što se mene lično tiče. Možda će biti pitanja zbog čega nisu prilikom usvajanja dnevnog reda skinute ove dvije tačke sa dnevnog reda, mi smo uvijek ostavljali mogućnost da podnosilac informacije ili izvještaja dođe u toku sjednice. Ono zbog čega sam bliže da se skine tačka s dnevnog reda da se u budućnosti ne bi pojavile situacije, znači nismo skinuli, ostavili smo tačku u sklopu dnevnog reda tad i tad, informaciju srednje škole i ako smo ostavili tada možemo i ovo. Poštujem odluku većine i ja sam tu.“

Kemal Bratić, općinski načelnik: „Jednu rečenicu sam zaboravio. Znači slažem se kako god da vijećnici odluče, nemam ništa protiv da se tačka skine. Hoću samo da kažem koliko je neozbiljno od strane direktora srednje škole, bez obzira šta je u pitanju, uvijek se može neko ovlastiti. Ako ja negdje ne mogu otići onda nekoga ovlastim i dam mu napismeno da predstavlja Općinu Doboj Istoku moje ime. Ovo je samo pokazatelj da pomenuta ne uvažava ni vas kao Općinsko vijeće, ni nas kao izvršnu vlast i evo pokazuje time da nije mogla da nađe za shodno da nekog ovlasti da predstavlja po meni još jedan biser na našoj općini, a to je Mješovita srednja škola. Vi kako god odlučite i ja se slažem sa tim.“

Hasan Hasančević, predsjednik kluba vijećnika SDA: „Tražim 5 minuta pauze radi konsultacija.“

Predsjedavajući je dao pauzu od 5 minuta.

Sjednica je nastavljena u 11,30 sati.

Nusret Dautović, predsjedavajući Općinskog vijeća: „Nastavljamo 9. tačku. Ima li još neko da se javlja za riječ?“

Hasan Hasančević, predsjednik kluba vijećnika SDA: „Ja ću u ime kluba predložiti da se skine tačka sa dnevnog reda pošto direktorice nema, a ne bih volio da raspravljamo o nekome koga nema, volim da se gledamo u oči.“

Nusret Dautović, predsjedavajući Općinskog vijeća: „Hvala lijepo. Javlja li se još neko za riječ? Ukoliko se ne javlja ko je za da se ova tačka skine sa dnevnog reda?“

Glasanje: ZA – 14, PROTIV – 0, UZDRŽANIH – 0. (Zerina Subašić je trenutno odsutna).

10. Razmatranje i usvajanje Informacije o upisu učenika u prve razrede JU OŠ „Klokotnica“ za 2022/2023. godinu

Nusret Dautović, predsjedavajući Općinskog vijeća: „Javlja li se neko za riječ?“

Emira Karić, predsjednica kluba vijećnika SDP: „Što se tiče ove tačke vidjeli smo jednu afirmativnu rečenicu gdje se kaže da je upisano više učenika u odnosu na prošlu školsku godinu i to je zaista jako dobro. Šta će biti u daljem periodu, vidjet ćemo, jer trenutno ni mi sami ne znamo iako smo manje mjesne zajednice i otprilike brojimo da li će biti dovoljno prema standardima. Mi smo čak mislili, mada je to druga tačka informacija u Brijesnici, da će čak ići kombinovano odjeljenje, ali srećom bio je dovoljan broj učenika. Mada ne treba bježati ni od tog kombinovanog odjeljenja, jer naravno adekvatna edukacija nastavnika i onog što smo prošli u školi trebala bi i to rezultirati. Bit ću iskrena bila sam veliki zagovarač da se ne napušta naša država Bosna i Hercegovina i da treba stvarati uslove. Mogu vam sada iskreno reći sretno svakom ko napusti ovu državu. Naši ljudi veoma dobro znaju da mogu kupovati diplome, da mogu plaćati ispite. Naši ljudi znaju da kvalitetne osobe, obrazovane osobe, osobe koje zrače nekim prosperitetom nisu dobro došle. Nisu dobro došle ni na jednu funkciju, ni na jedan kolektiv, dobro su došle osobe koje su podobne, koje slušaju, koje nemaju svoje pravo glasa itd. Zato kažem sretno svima onima koji napuste državu.“

Nusret Dautović, predsjedavajući Općinskog vijeća: „Hvala lijepo. Zamolio bih buduće diskutante da se držimo tačke dnevnog reda. Ovo je izvan tačke dnevnog reda, pa bih zamolio sve da se držimo ovoga što je na dnevnom redu. Javlja li se još neko za riječ? Ako se ne javlja niko za riječ, ko je za usvajanje ove Informacije?“

Glasanje: ZA – 14, PROTIV – 0, UZDRŽANIH – 0. (Zerina Subašić je trenutno odsutna).

11. Razmatranje i usvajanje Informacije o upisu učenika u prve razrede JU OŠ „Brijesnica“ za 2022/2023. godinu

Nusret Dautović, predsjedavajući Općinskog vijeća: „Javlja li se neko za riječ? Pošto se niko ne javlja, ko je za ovakvu informaciju?“

Glasanje: ZA – 14, PROTIV – 0, UZDRŽANIH – 0. (Zerina Subašić je trenutno odsutna).

12. Razmatranje i usvajanje Informacija o upisu učenika u prve razrede JU MSŠ Doboj Istok za 2022/2023. godinu

Nusret Dautović, predsjedavajući Općinskog vijeća: „Rukovodeći se prethodnom tačkom, predlažem da se i ova točka skine sa dnevnog reda. Ko je za skidanje sa dnevnog reda?“

Glasanje: ZA – 14, PROTIV – 0, UZDRŽANIH – 0. (Zerina Subašić je trenutno odsutna).

13. Razmatranje zahtjeva za davanje saglasnosti za povećanje cijena usluga boravka djece u JU „Dječija radost“ Doboj Istok

Nusret Dautović, predsjedavajući Općinskog vijeća: „Javlja li se neko za riječ?“

Kemal Skopljak, vijećnik BPS: „ Pošto prvi puta izlazim želim da vas sve poselamim i pozdravim. U principu nikada nisam ni za kakva povećanja, ali prije toga da kažem da sve razumijem, znam da su troškovi povećani i znam da treba pomoći, a dosadašnji rad zaslužuje da se ovo povećanje uradi. Međutim, shodno situaciji u društvu, ako smo već na fonu da podržavamo mlade, ako smo već na fonu da podržavamo natalitet u tom smislu predlažem da mi preuzmemo na sebe kao općina, pošto su već u budžetu, da za ovih mizernih 20 maraka povećamo im budžet. Znači da uzmemo na sebe da sufinansiramo da ne prebacujemo ovo povećanje na teret roditeljima koji šalju svoju djecu u vrtić.“

Emira Karić, predsjednica kluba vijećnika SDP: „Eto dobar prijedlog od strane kolege. Ja ću samo reći da ovo je nepopularna mjera, ali je nužna. Kada uzmemo da li je ona dobro statistički odrađena, jer to je jedna marka dnevno po djetetu koje pohađa vrtić. Znamo svi da su namirnice poskupile, a pogotovo ove zdrave namirnice, jer mogli ste pročitati u izvještaju da se u vrtiću koriste te zdrave namirnice, a ide i sezona grijanja, pa se pitam da li je marka i dovoljna po učeniku dnevno. Dobro krenuli ste sa određenim povećanjem, ali možda će ići uskoro, za par mjeseci, još jedno povećanje, jer vi morate biti rentabilni kako bi pružili određeni kvalitet usluge i roditeljima i djeci koja vašu ustanovu koriste. Dakle ne popularna mjera, ali ja stvarno smatram nužno, jer nije vrtić kriv za ovo stanje koje se dešava i poskupljenje goriva od čega je sve počelo. Slažem se mogli bi glasati, ukoliko možemo glasati o prijedlogu kolege da to ide na budžet općine i naći neki kod, naći neku stavku kako bi prebrodili, kako bi se smanjile cijene, a ja sam govorila o sufinansiranju i subvenciji, jer trebalo bi naći rješenje za tu problematiku.“

Izet Hodžić, zamjenik predsjedavajućeg Općinskog vijeća: „Bit ću veoma kratak. Znači Upravni odbor Javne ustanove za predškolsko obrazovanje „Dječija radost“ Doboj Istok se obratio ovoj instituciji Općinskom vijeću koja je nadležna za donošenje ovakvih odluka znači o minimalnom povećanju naknade koja je dosad bila. U obrazloženju stoji, a i mi smo na svom klubu razmatrali ovaj zahtjev, da smo mi u aprilu 2019. godine kao Općinsko vijeće donijeli odluku o povećanju. Znači odluka stupila u maju 2019. godine na snagu i od 2019. godine do sada je ta cijena bila. S obzirom da ne treba puno obrazlagati, jer u obrazloženju stoji tamo da su energenti, prehrambene namirnice, artikli za održavanje higijene i sve ostalo višestoko poskupili i ja sam i na klubu rekao da bi mi trebali da udovoljimo ovom zahtjevu, jer to je minimalno. S obzirom da sam malo ispitivao situaciju u drugim općinama ,znači opet sa ovim poskupljenjem, a samim tim i štiteći interese roditelja, građana naše općine, da je u drugim općinama i drugim vrtićima koji su u okruženju na području Kantona ta je nadoknada još veća od ove koju bi mi eventualno izglasali. Prema tome kažem da smo mi za ovakav zahtjev, odnosno za donošenje odluke koja bi minimalno po djetetu povećala sa 160 na 180 za cjelodnevni boravak, odnosno sa 130 na 150 za ovaj kraći boravak djece u našem obdaništu. Ovo što je kolega Kemo rekao mi možemo razmišljati u tom pravcu prilikom kreiranja budžeta za narednu budžetsku godinu i možda eventualno predvidjeti ta sredstva. U tom pravcu vjerovatno imamo razmišljanje za povećanje plata, ličnih dohodaka uposlenicima, ali vidjet ćemo. Ja očekujem kao što je do sada bila praksa da se u 11. mjesecu kreira nacrt budžeta općine Doboj Istok, pa u tom smislu možemo vidjeti i normalno voditi raspravu o svemu tome. Evo ja želim da kažem da ćemo mi podržati ovu odluku, odnosno prihvatiti zahtjev za davanje saglasnosti za povećanje cijena usluga boravka djece u našem obdaništu.“

Hasan Hasančević, predsjednik kluba vijećnika SDA: „ Samo da napomenem da će klub vijećnika SDA podržati ovo povećanje. Neke kontradiktornosti se iznose za govornicom. Nemoguće mi je i nepojmljivo da neki od kolega podržavaju odlazak, a jedni traže subvencije, a vlada kantona raspisala konkurs za subvencije za plaćanje dječijeg obdaništa. Po sinošnjim vijestima i informacijama još se nije javio dovoljan broj koliko ima sredstava po tom pitanju. Dakle trebamo iskoristiti sva sredstva što se nude za poboljšanje

života i rada i za poboljšanje materijalnog statusa radnika. Evo drago mi je što je kolega Izet i to spomenuo, tamo u izvještaju ko čita, ko ne čita nije bitno, kaže se da će biti teško naći radnika koji će raditi sa djecom za predškolski odgoj, taj obavezan vid od tri mjeseca koliko je već propisano, pa na osnovu čega ćemo tražiti ako ga nemamo od čega platiti ili nepredvidimo. Znači to su stvari onoliko je muzike koliko se plati, narodski rečeno. Ne da sam istraživao nego znam da je najjeftinije obdanište u Doboj Istoku. Daleko najjeftinije. Zamolio bih kolege i kolegice da iza ove govornice ne podržavaju odlazak mladih javno, da rade na neki drugi način kroz svoj doprinos u društvo i radu, a ovo je jedna od tih stvari. Moramo misliti i o nama svima. Evo sljedeći puta ćemo se dobro pripremiti, ovo što je načelnik kazao na jednoj od prethodnih tačaka. U zadnjih 10 godina koliko je uloženo, pa ćemo kazati kakvi su materijalni statusi radnika uposlenika u javnoj upravi itd. pa dokle ćemo moći ići sa takvim stvarima. Za sada je dobro, ali da bi ostali radnici, da bi ostali profesori, nazovite kako god hoćete, moraju biti adekvatno plaćeni, a ne podržavati ih da idu iz ove države koju je neko krvlju stvarao.“

Kemal Bratić, općinski načelnik: „Pokušat ću biti što kraći. Kada stavimo na sto sa 160 na 180 za cjelodnevni boravak, odnosno sa 8 na 9 maraka dnevno. Da li je to puno? Nije puno da nam za devet maraka neko samo čuva dijete, da nema ni hrane, da ga ne edukuje i bilo šta drugo. Znači, 9 maraka dnevno kada se poveća cijena, jer do sada je ona bila 8. Kada se radi o subvencijama, mi itekako dobre subvencije dajemo svakom djetetu. Na tih 9 ili 8 koliko je bilo, mi damo, općina daje dnevno i 208 maraka. Zašto to govorim? Neće dijete niko voditi u obdanište, ako je makar jedno nezaposleno, obično je to gdje su oba roditelja zaposlena. Da li je puno da jedan roditelj halali 9 maraka toplog obroka koji ima dnevno da bi mu neko čuvao, nahranio, čistio i edukovao dijete? Nije. To je smiješna cijena. Nego smo mi takvi kakvi smo i onda nam je sve nešto puno, sve smo nešto nezadovoljni. To je problem zašto, što neko prije mene reče, odlaze mladi, što mi takvu klimu stvaramo. Mi smo najveći krivci, a da ne govorimo o našim medijima uz uvažavanje naše kantonalne televizije. Ja znam dobro da je u susjednoj općini najjeftinije 230 maraka. I to je jeftino i to je džaba. Ja mislim da je Upravni odbor trebao još malo povećati, a mi itekako dobru subvenciju dajemo svakom djetetu i davat ćemo u narednom periodu. Kada se radi o dječijem obdaništu unazad 10 godina mi smo 3 – 4 puta povećavali iznos davanja za dječije obdanište, najmanje 3 – 4 puta, pa eto cijene su rasle, pa plate rasle, jer moramo tamo to pratiti i pratit ćemo i u buduću. Kao što neko reče da mi sada posebne subvencije dajemo, kome da dajemo subvencije? Da dajemo subvencije onima gdje je dvoje zaposleno? Da li je to ispravno? Da li smijemo to raditi? Evo vlada je raspisala poziv i svako može da se prijavi i da dobije određene subvencije. Opet se vraćam na početak svoje diskusije, 9 maraka dnevno. Čovjek mi priča ima iznemoglu majku i tražili neku ženu ili bilo koga da se brine 1000 maraka davao mjesečnu platu, nema koga naći. Neće niko da radi. Isto je i ovo. Iako nemam pravo na glasanje za ovo sam povećanje, minimalno povećanje da minimalnije ne može biti. Kao što Emira reče bilo je 8 sada je 9 maraka. Ali pazite za 9 maraka da vam neko čitav dan čuva dijete. To je osmica i nađite nekoga samo da čuva, nećete nikoga naći, a da ne govorim o manjoj djeci gdje ima još većih belaja, pa hrana, čisto, uredno, edukacija i evo čuvaju djecu.“

Emira Karić, predsjednica kluba vijećnika SDP: „Ne radi se o tački, nego o replici. Molim vas kolega ne stavljajte mi u usta da ja želim da mladi odlaze. Ja sam rekla da sam toliko bila pobornik da mladi ostanu, koliko se moj glas čuje i sada sam rekla ako odluče, a sami odlučuju, da im želim sretno. Molim vas ja ću reagovati i preko Kodeksa ponašanja i ostalog. Znači ne stavljajte, jer stavili ste mi do sada mnoge stvari u usta, malo sam bila nekada i kontradiktorna pokušavajući da razumijete stvari, a i sami ste evo bili kontradiktorni u vašoj replici. Treba raditi na poboljšanju da mladi ostanu, a radiš na poboljšanju i ljudi te mrze. Pojedini ljudi, e to je ta kontradiktornost.“

Kemal Skopljak, vijećnik BPS: „Očito se mi nismo razumjeli. Ja ću prvi glasati za ovu odluku. Znači podržat ću, jer naravno da ljudima treba. Moj nijet, što bi rekao načelnik, je bio ako postoji mogućnosti i ako možemo, jer to bi bilo jako poželjno da uradimo. Svim bi to bio plus i vama i nama ovdje koji sjedimo. Svima, a nisu neka sredstva. Znači ako postoji mogućnost, jer budžet raste, cijelo vrijeme raste, a bit će i projekcija budžeta uskoro, pa da ubacimo. Na to sam mislio.“

Kemal Bratić, općinski načelnik: „Kada nešto predlažemo, to sam milion puta rekao dajte da to studiozno ispitamo. Da li ima i sekunda opravdanosti za taj vaš prijedlog? Ja kažem da nema. Ja sam stavio argumente na sto. Ako je nekome puno 9 maraka dnevno dati da mu neko čuva dijete, samo da čuva, da nema edukacije, da nema engleskog, da nema ni ovog ni onog, o čemu mi pričamo. Druga stvar, budžet raste, raste naravno, ali dobivajući namjenska sredstva. Kada se radi o PDV, ne raste, pogledajte tamo. Kada dođu namjenska

sredstva, to svako zna, ona se moraju namjenski potrošiti. Ne možemo mi ako smo dobili za most, da potrošimo na obdanište. Nema šanse. O tome se radi. Opet, nadam se da me krivo ne shvatate, po meni nikakve opravdanosti nema da bilo ko, evo da i kanton daje subvenciju. Za mene nema opravdanosti. Ja govorim ono što ja mislim. Da ja i žena radimo i da nam neko daje subvenciju da nam neko čuva dijete za 9 maraka. Da je 900 maraka, pa hajde u redu je, ali 180 maraka, ni topli obrok jednog zaposlenog neće otići na ovo šta oni rade. O tome ja govorim, o opravdanosti. Da je 600 maraka, da mi dižemo sa 500 na 600, onda bih rekao hajmo ljudi pomoći i mi, jer je možda nekome od tih uposlenih 500 – 600 maraka plata. Ovako po meni nema nikakve opravdanosti. U suštini mi bi 20 maraka davali po upisanom djetetu i ja ponavljam mi dajemo 209 maraka mjesečno za svako dijete, jer hoćemo da sačuvamo obdanište, to nam je cilj i o tome smo pričali na prethodnoj tački. To nam je bio cilj, a mogli smo ga ugasiti, bilo je ideja, bilo je pritisaka, ali zahvaljujući Stranci demokratske akcije ono je ostalo, isključivo, odnosno prethodnim ljudima koji su vodili Općinu, kao i sadašnjim, koji na neki način, zajedno sa vijećnicima vode.“

Emira Karić, predsjednica kluba vijećnika SDP: „ Replika. Zahvaljujući Stranci demokratske akcije obdanište je ostalo, koja promocija.“

Jasmina Škrebo, direktorica JU „Dječija radost“ Doboj Istok: „ Ja ću samo da vas poselamim i pozdravim da vam se zahvalim na davanju saglasnosti za moje imenovanje za direktora obdaništa „Dječija radost“ Doboj Istok. Svi znate Upravni odbor je, kako tamo piše, naložio i vjerujte pošto sam nova imala sam nekoliko sastanaka sa ostalim obdaništima i oni su to još ranije dogovorili do početka školske godine sa roditeljima. Mi smo čekali da Upravni odbor to donese i nismo htjeli ništa govoriti dok oni to ne donesu. Mislim da je minimalno to što su oni donijeli. Imali smo roditeljski sastanak i niko se nije pobunio, nego su očekivali da će to biti i ranije. Samo još jednom da vam se zahvalim na imenovanju.“

Nusret Dautović, predsjedavajući Općinskog vijeća: „ Hvala lijepo. Pošto smo završili raspravu ja ovu tačku dajem na usvajanje. Ko je davanje saglasnosti za povećanje cijene boravka djece u obdaništu?“

Glasanje: ZA – 14, PROTIV – 0, UZDRŽANIH – 0. (Zerina Subašić je trenutno odsutna).

14. Razmatranje Molbe Koalicije za zaštitu rijeka Bosne i Hercegovine za potpisivanje deklaracije „Općine bez brana“.

Nusret Dautović, predsjedavajući Općinskog vijeća: „ Javlja li se neko za riječ?“

Izet Hodžić, zamjenik predsjedavajućeg Općinskog vijeća: „Posljednja je točka dnevnog reda, pa mi nećete zamjeriti. Naravno kao i o prethodnim tačkama na našem klubu raspravljali smo i proučili i pročitali ovu molbu da naša općina potpiše deklaraciju za nepostavljanje, odnosno ne izgradnji hidroelektrana do 10 MW na području naše općine. Prije svega moje lično zapažanje to smo dobili od Koalicije za zaštitu rijeka Bosne i Hercegovine i ako su ozbiljna institucija ili ozbiljna nevladina organizacija, jer nemamo ni adresu, ni broj telefona, ni žiro račun, ni ID broj, nema ništa, pogotovo pri čitanju ovoga dopisa koji su oni uputili meni to malo izgleda kontradiktorno. Pročitat ću jednu rečenicu u kojoj stoji između ostalog: U ovoj borbi nismo sami, budući da je Parlament Federacije BiH usvojio izmjene i dopune Zakona o električnoj energiji čime se zabranjuje izdavanje energetske dozvola za nove male hidroelektrane do 10 MW. Znači Parlament Federacije je usvojio izmjenu Zakona i zabranio izgradnju, odnosno izdavanje dozvola za ovo. Ne vidim apsolutno ni jedan razlog zbog čega bi mi potpisivali takvu deklaraciju ako je to zakonom regulisano i zabranjeno. Nas je ta činjenica vodila, pa smo mi na klubu to uporedili kao kada bi udruženje izviđača, nije bitno, neka nevladina organizacija, tražili da Općinsko vijeće donese odluku da se na crvenom svjetlu na semaforu ne prelazi pješački prelaz. Ako je zakonodavac koji je ovlašten za to donio takvu odluku, ja ne vidim nikakav razlog da mi potpisujemo takvu deklaraciju. Znam šta je pojam deklaracije da to nije obavezujuće, a pogotovo što općina kao lokalna zajednica nema nikakvih nadležnosti u izdavanju potrebne dokumentacije za ovakav vid objekata. Iz svega ovog pročitano i analiziranog naše je mišljenje da nema potrebe za potpisivanjem ovakve deklaracije. Možda to grubo zvuči, ali možda bi to neko „zloupotrijebio“. To je naše mišljenje.“

Emira Karić, predsjednica kluba vijećnika SDP: „Nije mi jasno, zamjeniče predsjedavajućeg, ako ste koristili taj zakon i ako ste došli do tog člana zakona, zašto niste na Kolegiju prije usvajanja dnevnog reda tražili da se ta tačka skine. Sada tu tačku razmatramo, a trebamo je odbiti, jer drugačije je kada ti skineš

tačku zato što nije logična točka. Evo govorim i predsjedavajućem ako je nešto zakon rekao onda ne treba ništa razmatrati, odnosno ta se točka ne treba stavljati na dnevni red.“

Kemal Bratić, općinski načelnik: „ Ne slažem se da je treba skinuti, treba raspravljati. Ja sam Emiru razumio zašto se nije skinula točka. Ja u potpunosti razumijem ovo što je zamjenik predsjedavajućeg rekao, jer i ja smatram da je ovo neozbiljno i da je na neki način, da malo budem grublji, nakaradno. Šta je nama nadležnost? Ja ovo doživljavam kao da nam je neko tražio saglasnost za izgradnju i da mi sada kažemo mi ne možemo dati, jer potpisujemo deklaraciju da ne dajemo. Ako neko podnese zahtjev i uz zakonsku regulativu dobije saglasnost od prostornog, od vodnog, od Sliva rijeke Save, ne možemo mi ljudima ne dati dozvolu. To je logika, čisto ko suza. Da li trebamo ovo odbiti, ja sam za to da odbijemo. Ako donesete drugačiju odluku ovlastite nekoga da potpiše jer ja neću potpisati. Ovo je za mene neozbiljno. Ja neću potpisati. Zašto? Ja bih volio da mi imamo izgrađene dvije tri te centrale da dobivamo koncesiju, kao što dobivaju neke druge općine za rudnik, za branu, za ovo ili ono po nekoliko miliona godišnje. Da li će ugroziti rijeku Spreču? Ona je već ugrožena, ne može biti gora. Da li bi to popravilo? Možda i bi popravilo. Sada da mi donesemo, bez obzira što deklaracija nije obavezujuća, neko će tim papirom mahati, koristit ga, a možda i zloupotrijebiti kao što Izet reče. Ja sam isključivo protiv toga da se potpisuje ova deklaracija. Ako vi donesete drugačiju odluku ja vas molim predsjedavajući, da ovlastite nekoga iz Vijeća da potpiše tu deklaraciju.“

Izet Hodžić, zamjenik predsjedavajućeg Općinskog vijeća: „ Koleginice Emira, vjerovatno se nismo razumjeli. Prije Kologija, ovo govorim kao ozbiljan čovjek i ozbiljan vijećnik, nisam imao materijale na uvid i kada svi vijećnici dobiju materijale i ja dobijem. Nisam ja čitao zakon nego sam čitao dopis koji nam je upućen od ove koalicije. Znači u tom dopisu stoji da je federalni Parlament usvojio izmjene zakona gdje je rečeno da se zabranjuje gradnja predmetnih objekata hidroelektrana do 10 KW. Prema tome, pokušavam da budem shvaćen, ako je to zakonom zabranjeno ne vidim uopšte razlog zbog čega bi lokalne zajednice koje nemaju ovlaštenja za izdavanje tih dozvola trebale da potpisuju nekakve deklaracije. To u najmanju ruku izgleda neozbiljno.“

Nusret Dautović, predsjedavajući Općinskog vijeća: „ Hvala lijepo. Javlja li se još neko za riječ? Ko je za molbu ove Koalicije za zaštitu rijeka?

Glasanje: ZA – 0, PROTIV – 0, UZDRŽANIH – 14.(Zerina Subašić je trenutno odsutna).

Sa ovom tačkom završavamo današnju sjednicu i zahvaljujem se vijećnicima na učešću i vidimo se sljedećeg mjeseca. “

Sjednica je završena u 12,00 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVAJUĆI
OPĆINSKOG VIJEĆA
Nusret Dautović

Zapisnik je usvojen na 21. redovnoj sjednici Općinskog vijeća Doboj Istok održanoj dana 24.11.2022. godine.

U Klokotnici, dana 24.11.2022. godine

Zabilješku sačinio
Omer Hadžić, sekretar Općine